

【河壩水故鄉情】彭歲玲原作

還細時節，僱戴在苗栗山肚，該位一山過一山，山山有坑水。該兜河壩水，係僱兜生活盡重要个俚憑¹，做得抽水蔭田、拔水淋菜、河壩洗衫。對僱來講，童年回憶就像河壩水，流流流流永不斷。

河壩脣个景色實在盡靚，尤其係逐年五月天油桐開花个時節，白到滿山坪。河壩脣還有一種雪白个野薑花，有種特別个親切自然，花香使人舒爽，僱時常摘轉去屋下欣賞，有一種感動、幸福个感覺。

僱係滿妹仔，兄弟姊妹歲數差當多，故所盡黏阿姆。還記得，阿姆逐日朝晨頭一定會揸等菜籃去河壩洗衫，河壩水鮮到見底，洗衫時節腳放在水肚，水肚个溜苔、魚仔、蝦公，時常會爬到腳邊爪癢，該感覺盡像來撩你、尋你搞樣仔，想愛用手去捉又捉毋著。同蝦公搞，會暢到毋知好轉，故所，僱盡好去河壩洗衫，洗越久越好。

阿姆在山排開碇仔做菜園，去河壩拔水蹶崎上菜園係逐日个事頭，僱乜想愛搵手，就學阿姆拔水上大崎。毋過，一擔水晃晃激激，拔到菜園伸²無一半，阿姆看僱恁煞猛，佢會笑笑仔講：「拔少無相干！做事情毋好半桶水就好！」阿姆个話，影響僱盡大。

¹ 俚憑：音 va`ben；依靠。

² 伸：音 cun`；剩下、多餘。

阿姆煞猛種菜加上畜頭牲，三餐飯菜從來就毋使買。連僱兜細人仔搞到肚屎枵，菜園肚个笏瓜³隨手摘來食，就係止飢最好个零嗒。

僱兜最好用阿爸做个笏仔⁴捉蝦公，內肚放等攪飼料个香飯糰，蝦公鼻著就會爬入去，笏仔入得出毋得，就有一笏仔个蝦公。竹笏仔差毋多隔 50 公尺放一個，用石頭砵等，第二日正來收。毋過，成時無堵好會收著隔壁鄰舍个，故所，愛注意，係無你就愛將煮好个蝦公兜一盤去同人會失禮囉！

河壩水成時乜會像發譴樣仔：堵著風搓天，浩洪斗雨，河壩滄盆滄鉢無法度行兼。該河壩係僱兜去學校讀書一定愛經過个路，平常時一粒一粒石頭排列个石跳仔就係橋。毋過，風搓天發大水，水滄到麼个都看毋著，放學時節，一定會看著莊頭肚个阿叔阿伯，在對面等等愛帶細人仔過河壩，大人細子手牽手渡過危險。這河壩水帶分僱兜个考驗，乜分僱兜體會著大人惜細子个情懷，永生難忘。

月係故鄉圓，水係故鄉情，流不停个河壩水係醺醺⁵个鄉情，這份情係僱這生人最珍貴个寶。

³ 笏瓜：音 ned`gua`；小黃瓜。

⁴ 笏仔：音 ho`e`；捕蝦簍、捕蟹簍。

⁵ 醺：音 neu`；濃稠。